



UPA 2016/105-01

26.04.2016

**Uunga siunnersuut: Kalaallit Nunaanni sulisilluni ajoqusersinnaanermut isumannaarineq pillugu inatsisip allangortinneqarnissaa pillugu inatsisissatut siunnersuummut Namminersorlutik Oqartussat oqaaseqaateqarnissaat pillugu Inatsisartut aalajangiiffigisassaattut siunnersuut.**

(Inuussutissarsiornermut, Suliffeqarnermut, Niuernermut Nunanullu allanut Naalakkersuisoq)

Kalaallit Nunatsinni sulisilluni ajoqusersinnaanermut isumannaarineq pillugu inatsisip allangortinneqarnissaa pillugu inatsisissatut siunnersuummut Namminersorlutik Oqartussat oqaaseqaateqarnissaat pillugu Inatsisartut aalajangiiffigisassaattut siunnersuut Partii Naleqqamiit imannak oqaaseqarfigissuarput.

Soorlu Naalakkersuisut saqqummiussinerminni oqaatigingaat, danskit oqartussaasuisa nammineerluni pigisoq, “Inuussutissarsiornermi Sulisilluni Sillimmasiineq” (Arbejdsmarkedets Erhvervssikring), “Silisilluni Soraarnerussutissiassanut ilassutinut” ( Arbejdsmarkedets Tillægspension) atasussatut pilersinniarlugu aalijangersimangaat.

Tassa Inuussutissarsiornermi Sulisilluni Sillimmasiisarneq, danskit oqartussaasuisa sulisilluni sillimmasiinerlut tunngasut, suliffeqarfimmut imminut pigisumut ilanngunneqarnissaa aaliangersimangaat, nunatsinni oqartussaasut tusarniaqqaarnagit.

Taamaattut danskit oqartussaasuisa nunatsinnut attuumassuteqartunik aaliangiisarnerat, naggataatigullu uagut akuersaaginnartussatut inissiisarnerat assut eqqarsarnartoqartipparput, taamaattumik minnerunngitsumillu nunatta nammineernerulernissamik suliniarnitsinnut atatillugu Kalaallit Nunatsinni sulisilluni ajoqusersinnaanermut sillimmasiisarnerlut tunngasut nammineerluta pilersitsinissarput sulissutigisariaqaripput isumaqarpugut.

Tassami danskit oqartussaasuisa aaliangersagaasa malittarijuaannarnissaannut pissusissamisoortutut isigiinnarsinnaanngilagut. Nunatsinni pissutsit immikkuullarissuupput, tamatigullu danmark-imi pissutsinnut naleqqersuunneqaannarsinnaasaratik.

Atagu eqqarsaatigilluartaartigu, soormi uagut nammineeirluta sillimmasiisarnernut tunngasut ingerlassinnaannginnerigut, tassami nalunngereerparput, sillimmasiisarnernut assigiinngitsorpassuarnut aningaasarparujussuit ukiut tamaasa nunatsinniit annissuunneqartartut.

Taamatut oqaaseqarluta siunnersuutip aappassaaneerreqannginnerani ataatsimiititaliami susassaqartumi sukumiisumik oqaluuserineqarnissaa inassutingaarput.